



恪靖奏稿初編卷三目錄

衢州東南北三路一律肅清摺

探報湖州府城失守片

道員藉差回籍延不歸營請
旨革職片

查明浙江失事文武各員片

甯台郡縣克復溫郡漸就肅清摺

請援照湖北米捐減成章程收捐以濟軍食摺

蠲免浙省錢糧敬陳辦理情形摺

請飭催道府各員迅速赴浙摺

馳援遂安擊敗大股逆賊摺

總兵請假回籍遴員接署摺

資遣衢防兵勇片

查辦失守文武先將情罪較重之員定擬摺

衢州東南北三路一律肅清摺

奏爲官軍攻剿衢州東南北三路賊壘地方一律肅清
現籌進取情形恭摺奏祈

聖鑒事竊臣前因衢州南北兩路喫緊由開化回軍五
月初四日馳抵衢州西北路沐塵地方訶知侍逆李世
賢糾集賊目馮谷勝陳壽僞主將賴逆僞佐將林逆駱
逆等由龍游蘭溪壽昌上犯於北路峽口蓮花童村裏
外黃五坦洋塘盈川一帶聯營三十餘座並盤踞杜澤
雲溪璋塘等處村莊又令僞嘏天義李逆鮒天義侯逆

於南路石室街築四壘聯爲一大壘東路大洲全旺安

仁埠等處各築數壘相爲犄角

臣

察北路地勢緊連遂

安開化常山賊勢亦較重於東南兩路前處州鎮總兵

劉培元一軍入浙後

臣

卽飭其進紮常山適江西撫

念

臣

軍兵力單薄調信防屈蟠王德榜兩軍赴浙會剿

臣

并飭其會合劉培元一軍進駐江西縣屬後溪街以

防石室街之賊而自率各軍由北路進剿其東南安仁

街一帶之賊檄李定太飭總兵郭啟舉等憑河堵截以

防橫竄十二日派各營分九路並進甫抵雲溪賊見我

軍旂幟不及列隊紛紛奔潰我軍猛躡之僅擒斬百餘人而還十三日臣率各軍進紮雲溪十五日分三路進攻襄外黃蓮花等處賊巢楊昌濬張聲恒楊和貴督各營出右路進劉典楊鼎勲朱明亮余萃隆黃有功馬德順督各營由中路進李耀南陶鴻勲鍾南英李良平劉光明張人和邢得督各營由左路進崔大光李世顏楊芳桂督各營從後接應我軍左路南至艮山涼亭而蓮花洋塘盈川等處之賊先已列隊田壠並挑悍賊數千過河而陣張聲恒率勇先進甫列陣悍賊數十躍馬而

來步賊繼之張聲恒令鎗礮排擊賊敗追至田壠賊復
張兩翼來抄對岸之賊亦紛紛跣淺過河張聲恒悉力
抵禦正鏖戰間楊和貴馬德順及兵兩哨先後馳至斃
騎馬賊目數人賊勢稍却乘勝追至河邊侍逆李世賢
張紅蓋坐山巔麾騎賊向前衝突楊昌濬率親兵往來
堵禦刀矛緊接斃悍賊數十人我軍陣亡及受傷者亦
以數十計相持兩時之久適我軍由左路進攻峽口者
斃賊二百餘人破賊壘三座楊鼎勲復由蓮花過河燒
賊大壘一座殺悍賊數十名侍逆偵知中左兩路俱敗

不敢戀戰紛紛遁走我軍復追數里始整隊而還此十
二十五兩日攻剿獲勝之情形也嗣大雨連旬溪流暴
漲我軍距賊巢前阻二溪不能鳧水出隊至六月初五
日天霽水退初七日卽飭劉典督同各營旗由左路進
攻裏外黃之賊楊昌濬督同各營旗分列艮山涼亭一
帶會攻蓮花洋塘盈川之賊我軍左路行抵童村山上
瞭見外黃村莊甚大後崙山一帶賊壘亦極堅固劉典
遂麾中營各哨嚴陣村前河干同李良平楊和貴伏童
村下山內黃有功邢得伏童村上山內遣親兵數十人

至村前挑戰外黃之賊見我兵不多蜂擁而來劉典飭
各哨穩站勿動令黃有功邢得由上邊鳧水過河繞出
賊後裏黃壘中之賊大隊來援劉典即麾軍過河接戰
楊芳桂馬隊繼之外黃壘中之賊見我軍過河亦鳧水
來鈔後路李良平楊和貴於林內突起擊之各路齊進
呼聲動天無不以一當百賊敗退入營燃放鎗礮我軍
奮勇直前拔開花籬地刺踰濠而入賊勢不支適楊鼎
勲劉光明張志超所部由峽口繞至外黃後山搖旗擂
鼓而下羣賊驚駭不知所措棄械狂奔中右兩路見左

路烟燄蔽空知我軍得手卽分路乘勢進攻蓮花壘中之賊亦悉數遁走追奔二十餘里將沿途賊壘一律踏平是役斃悍賊數百名生擒六十名拔出難民男婦以數千計下自盈川上至裏外黃一帶數十里間賊壘三十餘座一律踏燬淨盡奪獲偽印十餘顆軍械鎗礮旗幟無算其南路石室街東路大洲之賊聞北路賊巢旣破驚怖殊甚初九日卯刻劉培元李定太會同江西派委援剿之屈蟠王德榜等各率所部由南路進剿賊聞官軍大至稟壘狂奔各營急起追之比至大洲大洲賊

亦棄壘遁沿途斃賊百數十名所有衢州東南兩路賊壘亦一律踏毀淨盡此六月初七初九兩日剿平衢郡東南北三路賊巢實在情形也現在各敗賊紛竄龍游亦有竄至蘭溪者臣俟軍米運齊卽督各營相機攻剿竊維浙江賊數雖數十萬之多而皆聽首逆李世賢一人之指嗾該逆自江山擊敗後卽由遂昌邊境繞道回踞龍游而倚金華爲老巢嚴處爲掎角蘭溪壽昌湯溪宣平松陽等縣皆分布賊黨拚死抗拒五月十五日該逆經官軍擊敗後是夜由龍游退回金華嗣竄永康近

又有竄湯溪縣境之耗賊蹤倏忽靡常其注意仍在抄

襲

臣軍後路

臣

先擬衢州江山兵力足資堵截卽當由

壽昌淳安直搗嚴州以規省會近探杭州守賊無多賊之大勢趨重金華自應併力先將龍游壽昌蘭溪湯溪等處次第攻剿撤其藩籬犁其巢穴然後分兵嚴處感之以取破竹之勢蔣益澧五月初七日自廣東省城發稟尙無啓行確期所部十七營已早飛札催之大約到浙當在七月

臣

相度形勢似宜先金華而後嚴處拜摺

後卽當進圖龍游壽昌節節搜剿冀於全局有尺寸之

補

臣

軍新募之勇已陸續前來劉培元所部三千二百

名已於五月初一日到浙現正造船調礮添設水師一

俟就緒相機布置亦可稍省陸路兵力而護運軍食軍

火乃能免遲滯而速戎機所有攻剿獲勝衢州東南北

三路一律肅清緣由謹會同協辦大學士兩江督

臣曾

國藩恭摺由驛馳

奏伏乞

皇上聖鑒訓示施行謹

奏

同治元年六月十六日

議政王軍機大臣奉

旨另有旨欽此

探報湖州府城失守片

再臣頃據江蘇候補知府趙炳麟自安慶發稟稱接上

海來械探聞湖州府城已於五月初三日失守其詳細

情形尙候續探稟報臣查湖州府城孤懸賊中紳民苦

守數月之久卒以糧盡無援致有此變臣忝膺疆寄不

能迅速援剿咎無可辭應請

旨將臣交部嚴加議處其一切詳細情形容俟查明具

奏理合先行附片請

旨

同治元年六月十六日

議政王軍機大臣奉

旨另有旨欽此

道員藉差回籍延不歸營請

旨革職片

再甯紹台道梁恭辰上年八月在杭經前撫

臣

王有齡

飭令赴閩催餉迄今尙未來浙亦未稟報催提何款及

有無著落

臣

查該員赴閩正浙事孔亟之會閩省有餉

可催則應解餉赴浙閩省無餉可催亦應赴

臣

營另候

差委乃該員藉差回福建原籍在彼逗遛七八月之久坐視浙事之成敗以便進止之私圖其居心實不可問若再任其濫廁監司殊不足以端表率應請

旨將該員革職永不敘用以爲屬吏規避取巧者戒至前署甯紹台道張景渠已奉

旨革職拏問現在台州甯波相繼克復員缺未便久懸查有委用道史致謬前在江西南昌知府任內辦事實心頗洽輿論現飭赴上海勸辦捐輸於甯紹情形亦尙熟悉所有甯紹台道一缺應檄飭該員署理並請另行

簡放以重職守是否有當伏乞

聖鑒施行謹

奏

同治元年六月十六日

議政王軍機大臣奉

旨另有旨欽此

查明浙江失事文武各員片

再浙省失守文武各員疊奉

諭旨交臣查辦現已革總兵米興朝羅大春布政使林

福祥織造恒起俱先後赴營投到此外尚有升用總兵